



INUIT ATAQATIGIIT INATSISARTUNI

Ulloq: 09. februar 2007

Inatsisartut Suleriaasianni § 36, imm. 1 naapertorlugu Naalakkersuisunut apeqqut imaattoq matumuuna saqqummiuppara:

Naalakkersuisunut apeqqut:

Ilinniagaqartut angajoqqaaminni najugaqanngitsut ilinniagaqarnersiutunik assigiimmik anertussuseqartunik tamarmik pisaleqqullugit ilinniagaqarnersiutit pillugit maleruagassanik allannguinissamik Inatsisartut tamarmiullutik 2006-imi ukiukkut ataatsimiinnerminni aalajangersariigaat (UKIU 2006/88), Naalakkersuisut qanoq malitseqartinnialersaarpaat?
(Inatsisartuni ilaasortaq Johan Lund Olsen, Inuit Ataqatigiit)

Tunngavilersuut:

Inatsisartut 2006-imi ukiukkut ataatsimiinneranni oqaluuserisassani immikkoortoq UKIU 2006/88-mi, ilinniagaqartut angajoqqaaminni najugaqanngitsut ilinniagaqarnersiutunik assigiimmik anertussuseqartunik tamarmik pisaleqqullugit ilinniagaqarnersiutit pillugit maleruagassanik atuuttunik allanngueqqullugit Naalakkersuisut peqquneqassasut, Inatsisartut aalajangiiffigisassaattut siunnersuuteqarpunga.

Siunnersuut partiit tamarmiullutik taperserpaat peqatigitillugulu siunnersuut aappassaaneerseqartusannngormat Kultureqarnermut Ilinniartitaanermullu Ataatsimiititaliamit isumaqatigiittumit isumaliutissiissusiorfigineqarpoq akuersissutigineqarnissaa inassutigineqarluni. Aappassaaneerinninnermi Naalakkersuisut akissuteqarnerminni nalunaarutigivaat ilinniagaqarnersiuteqartitsisarneq pillugu nalunaarut september 2006-mi naliliiffigineqarnera naammassippat, 2007-imut Aningaasanut Inatsisissaq suliarineqalerpat siunnersuut ilaatinneqassasoq.

2006-imi ukiakkut aningaasanut inatsisissap suliarineqarneranut atasumik Naalakkersuisut 19. september 2006 Aningaasaqarnermut Ataatsimiititaliamut akissuteqarlutik ilimasaaripput Inatsisartut siusinnerusukkut aalajangiutereersimasaat naapertorlugu AIS 07-imut allannguutissamik siunnersuuteqartoqassasoq.

Taamatulli pisoqanngilaq, naluneqanngitsutummi 1. november 2006 Aningaasaqarnermut Ataatsimiititaliamut akissuteqarnerminni Naalakkersuisut nalunaarutigivaat, Inatsisartut aalajangersimaneerat 2008-mut aningaasanut inatsisissap suliarineqarnissaanut atatillugu aatsaat Naalakkersuisut ilanngutissallugu naatsorsuutigivaat.

2008-mut Aningaasanut Inatsisissap suliarineqarnera maannakkorpiaq aallartisarneqaleruttorpoq. Tamanna tunngavigalugu Naalakkersuisunut apeqqutiginiarpara Inatsisartut UKIU 06/88-mi aalajangersagaat, ilinniagaqartut angajoqqaaminni najugaqanngitsut najugaqartullu assigiinngitsunik atugassaqartinneqarnerisa taamaattariaqarnera, qanoq malitseqartinnialersaarneraat?

Aalajangersagaq UKIU 2006/88 matumani ilanngunneqarpoq.

